

Willy Willems di AVP:

# WATTY VOS, E MAESTRO CU A SIMBOLIZA

ORANJESTAD (AAN): Na scol nos ta haya maestronan cu ta educa nos. Den politica tambe nos tin maestronan cu ta siña nos y mustra nos hopi. Hopi ta esnan cu den pasado a siña for di e gran politiconan manera Shon A Eman q.e.p.d. pa despues nan tambe bira politiconan importante. Sr. Betico Croes q.e.p.d. ta un di nan kende na su turno tambe a guia hopi politico.

Den nos tempo moderno nos tin dos maestro politico, un di nan ta nos Promer Minister Henny Eman kende ta inspira nos tur dia cu su manera di goberna nos pais. E otro ta nos Watty Vos q.e.p.d., kende ya a keda comproba pa henter nos comunidad di ta un maestro excepcional. Tur loke bo a siña for di e maestro di taya aki ta pa bo keda corda pa semper den bo bida diario y como politico.

Tempo cu mi persona a worde aserca pa drenta e arena politico, ariba e promer cita na cas di partido mi tabata tin e honor di sinta na mesa cu nada mas cu politiconan grandi manera Henny Eman, Mito Croes y Watty Vos, Hector Gonzales, Chibi Croes q.e.p.d. Tur e personanan aki desde e momento ey ya a duna nan consehonan politico.

Mi ta corda bon cla kico Watty Vos a conseha mi na inicio di mi carera politico bisando: pa tene na cuenta cu tin cosnan den politica cu bo no ta ni pensa!! corda pa papianan! Pues di e forma aki Watty kier concientisa ami y tur hende pa semper pensa y actua sano. Un otro conseho importante di Watty na inicio tabata: "Pa bo ta un politico exitoso wak pa semper bo keda amigo di prensa pasobra esaki ta importante pa bo carera".

**Simbolo di Union:** Watty semper tabata e persona pa intermedia den cualkier desunion politico y semper tabata esun pa haci tur posibel pa trece union y paz. No solamente den e partidonan jega na dje pero tambe pa union di AVP / MEP, algo cu e no a logra por completo. Pero awe na su fayesimento ela logra algo mucho mas grandi. Si, Watty Vos a logra algo mucho mas significante, esta un union nacional, caminda henter nos pais a uni pa rendi respet na su persona y caminda cu tur partidonan politico di Aruba y reino Hulandes a sinta hunto recordando tur cos bon cu Watty a haci pa Aruba y Antillas. E union aki cu Watty a logra ta algo cu ningun di nos, politico y no politico, mester lubida hamas.

Tambe loke cu hamas mi por lubida ta un conseho cu Watty a dunami, un ehempel

cu a dunami mas confiansa den mi carera politico. Tabata recientemente den parlamento ora cu Watty a dunami un sosten sumamente importante. Na e ocasion aki den Parlamento mi a toca un punto di maneho di Ministerio di Obras Publicas pa loke ta infraestructura di nos barionan entre otro e 'Plan di Bario'. Mi a tuma mi bario Brazil como ehempel y mi a keda elogia mi bario sin fin!. Watty na su turno ora cu ela trata e puntunan cu mi a trece padilanti a dunami e sosten di mas importante den mi carera politico. Watty a bisa cu e mes tambe tabata asina tempo cu e tabata hoben y te ainda e ta asina. Segun Watty "bo mester stima bo amigonan, bo mester


stima bo deporte, bo mester stima bo bario y su hendenan, anto e sintimento aki bo mester tin pa loke bo ta desea pa haci pa bo pais". E sintimento aki di stimacion y fieltad na su deporte, su bario y su amigonan a worde comproba tambe for di discurso y palabranan di tur esnan cu a conoce.

Awe Watty su curpa no ta sufriendo mas. Su alma lo sigui pa eternidad den atmosfera y su echonan den nos memoria. Nos lo sinti su falta, pero di otro banda durante y den e lunanan y añanan nos dilanti tur hende di Watty y AVP lo haci tur esfuerzo pa no desfrauda Watty, nos lo haci e maximo pa Watty keda orguyoso di nos.

**TELEFONNAN DI DIARIO**  
**826747- FAX 828551**



**Edgar Joaquin Vos**  
cariñosamente yama "Watty"



ta gradici tur miembro, henter e Comunidad Arubano cu a mustra atencion durante enfermedad, fayecimento y entiero

**di Su Excelencia, Ministro di Justicia  
y Obran Publico,  
Mr. Watty Edgar Vos**

*E atencion den forma di oracion, yamada telefonico,  
flor, telergam y asistencia na ceremonia sin duda  
tabata un muestra di aprecio  
y un sosten moral pa su esposa, yiunan,  
rumannan y demas famia y amigonan*

Tambe kier invita tur miembro di Partido y Pueblo en general pa e di dos Santo Sacrificio di Misa.

Diamars, 16 di Januari 2001 pa 7:00 pm  
Na Kapel di Madiki y  
Diaranzon, 17 di Januari 2001 pa 7:30 pm  
un oracion na cas di Partido